

緒形迹亦所難掩臣等意以其招辭密問于鄭叔夏盤問同里且所引人等令本道繫械上送憑閱後罪人可得敢 稟 答曰依啓○鄭欽趙瑗趙瑗子趙希逸供招 入啓鄭欽招辭大槩 天朝勅書無得見之路趙瑗以病廢人恒惴失對○趙瑗招辭大槩積年重病精神昏亂天威之下誤錯上達臣末子希進與同里寓居金達孝之孫金瑩交結戲遊前年十二月希進自金瑩家得 勅書草來適其兄希逸自鄭欽家還中路相逢奪來○趙希逸招辭大槩自水原歸牙山路見希進手持一紙書問其何處得來答云金瑩家得來○推鞠廳 啓曰宋儒直以下元惡大憝之類幾伏 天誅其他賊黨之情狀深重者亦已令械送或拿束但考察使兵使巡邊使狀 啓則或以辭連或以聞見或以次知囚繫於各邑者其數甚多一道人情必多騷動若不及時辨決久滯牢獄則凡兇賊平日足迹經過之處皆有不安全之心輾轉疑阻更相訾散殊非鎮靜之道臣等區區愚意宜依頃日 聖教之旨乘此霽澤之下令本道監司尹承勲除罪狀稍重可以訊問者外其他脅從不關於總鞫者急速推閱分等啓聞後臣等更為擬議 稟旨施行 答曰依啓○戊申夜一更東方乾方有氣如火○正言奇自獻來 啓曰